

niaranai nanu Kanakanavu ara'una

'una ucani Kanakanavu tamna niurina 'una makasi, miaa miana miana citai ia, sua caukia niaranai na “Nacunga” kisun 'unai ara'una. makasi mamarang, sua 'unai isua ia, 'esi na tararakaua taniaru, nguai sua tung-fang kisun. sua mata'uru arapiningi ia, kina'ucanga tassa. nakai miaa pivura nanaku ia, surumu maroka sua sarunai. koo cu pui'i. nanaku isua, makasua cu miarara, nakai manaturu cupungu tia aracuvuru. kamanumanu sarunai. patanganaiun kee “Naparumaci” kisun. miaa aratatia cu manu isua. tuturuun nguain tamna cina, miana cucuru kani muru'inasu 'apacuvuru 'inia. marivari Naparumaci, tatia cu ku! 'una cu 'intasu tani iakuru kasua. surumu putairi na masinang cu ranungu karu suru. matapari'i ranungu. macancani cumacapini tuisua tanasa. maka'una putairi, sua matapari'i ranungu tuisua cu cau. kari mamarang makasi, sua cau isua ia, nguai Kanakanavu tamna tamutamua.

'una isua makasi, miaa 'esi Nacunga, 'una cani cupungana marivici tacau arakanu. miaa maica na capici “Na'usurana”, 'una ucani tacau kamanumanu tamtitu. turupang arakanu. ariviciun nguani tacau cina mataa tamtitu pui'i Nacunga, nakai tacau cina takacicini marivici tamtitu

manguru mukusa Na'usurana. cau arakanu mukusa Na'usurana mapui'i tacau, nakai maka'una pa tacau manguru na Na'usurana. makasua makatumuru pupui'i. pacupungu cu cau, nguai kara tacau 'esi masisakau kitana? aravari kucu kita mukusa Na'usurana. makasua cu, caukia cucumeni marivici cu cani pininga aravari 'inia.

macuvungu, niarakacaua cau, tuisua cu macuvungu, vanai tia pavakanu tani ka'uma. tikirimi munasu to'unaa cumacuvuru. caukia maka'una aranai Na'usurana murocu aravari, nguai sua na cikiringa cakuran Namasia. katatanasa ka'u'uma 'inia. masini, noo muciri kita na tanasun Namasia. tarakusa na cara Nangisaru. 'una 'inia marungucai tarupu cimuru, nguai isua sua Na'usurana. caukia masini “tamua cimuru” kisun Kanakanavu sua Na'usurana.

(文章大意 僅供參考) ※字數限 200 字

卡那卡那富族起源傳說

傳說在遠古時代族人起源於「那之昂」。那個地方位在太陽出現的方向，是所謂的東方。最先出現的是夫妻兩人，妻子生了個兒子取名為 Naparumaci。小孩長大，突然踢向長滿紅葉的茄苳樹，樹葉疊成一棟棟的家屋，落葉變成人，就是始祖。

那之昂時期，有家族的獵團帶獵狗出獵，行經藤芭山附近，一隻母狗生了幼崽，狩獵結束後，母狗又帶小狗到藤芭山，族人便開始先後移住形成大聚落，後來又從藤芭山往下遷移，也就是在楠梓仙溪的兩岸建屋耕作。